

四庫全書

子部

欽定四庫全書

子部

星學大成卷十九

詳校官監察御史

臣邱庭澍

靈臺郎

臣倪廷梅覆勘

總校官進士

臣朱鈐

校對官中書

臣潘庭筠

謄錄監生

臣李崇實

欽定四庫全書

星學大成卷十九

明 萬民英 撰

三辰通載

六曜

太陰星

總龜算法置積日減二筭以三千二百二十四一之
為順行減積日行

餘不滿順行數者以九因之以中數二百四十八數

除之除不盡者為殘分在一百二十四以下入疾厯
二百二十四以上入遲厯

疾行一日行十四度半強

平行一日行十三度半強

遲行一日行十二度強二十七日有奇行一周天更
行二日與日合朔

太陰論

太陰月宿水之精一名莫星其色青白其性仁慈人

臣之象母之所配其行宮度有遲疾弦前行疾弦後
行遲已具于前大約遲疾中間率行十三度三十七
分一月一周天生於滄海之上出於正西之方也

巳生人以為祿主 甲生人以為貴星

正魁星

乙生人以為印星 丙生人以為耗星

丁生人以為福星 戊生人以為暗星

庚生人以為權星 辛生人以為囚星

壬生人以為蔭星 癸生人以為魁刑星

此星廟成旺酉喜已樂申順於亥丑二位怒於寅者
此月在何位則為安身之所若旺樂之處則為吉夜
生人見之會金木二星於身命宮主福祿全備享福
溫暖更為祿主星在旺宮大貴至月朔則交會在卯
十五則相望上弦生人為福下弦生人則減福若圓
望會羅計二曜定主交蝕此星配屬夜生人三方主
卿珎經云月精廟旺照婁星出贊珪璋輔紫宸臨身
自然名職重躔胃應為台鼎人水金共位威權鎮木

炁同宮秀氣臻不晦不殘行淨道益財益祿自榮身
若在驛馬貴人祿宮之地則大富

經云安身好在祿貴鄉若逢祿馬最高強居在妻鄉
多作贅不然妻尅主其雙若遇空亡孤寡地九流之
士甚相當忽然好生疾囚位男兒天賤女非良大抵
論星須安身坐命臨在祿馬貴人之鄉則無不吉更
得善星照視同宮則其貴無疑此太陰星惟六辛人
見不分日夜全不得力最忌計羅同凶經云計都臨

身難免此生之毒藥鑑心經云計都身命火星逆忽然羅孛或相當此命終須逢夭折不然橫死路頭亡又云計都坐命太陰中身命逢之毒藥終坐命在辰者以此為官星六癸人以為食祿神坐命在丑以為科甲夫看命推星先看其格斷人災福如魁星入天門與天官正祿同宮更吉星照命者便作大魁斷之金木羅土計五座總入廟更一星近月當作侍從命斷之權星祿主為吉星同入命者作京官以上命斷

之五位星辰入命或有入廟乘旺喜樂宮者作三品
職斷之月孛獨行天門朝有太陰在巳者作翰林學
士斷之三刑星同在官祿宮作幕職命斷之二十以
上則無赫顯宜四十以後方見享福羅拱天門與炁
相望更有吉星入廟照命者或三位星辰在福德宮
者並作貴斷之巳生人以火為天官正祿星喜輔於
月須夜則吉晝生傷母

太陰歌

太陰乃是月之精纔出中天萬國明初夜一輪光皓

潔人皆瞻仰快人情

月之初生人皆喜見

配母道身從生

月配母道

身從母生

溫柔豐美好儀形命宮兩曜交相合貴位宜居

始見榮

日月交合照人命主如此

歲德同宮賢聖善外家送物不

曾停

月木相會主賢母

夜火會得延齡晝生風患母須刑

太陰

與夜火合主壽晝生主風癰尅母

鎮星來同言蹇滯下弦眼目更無

睛

土星會主言語蹇滯若在下弦主眼目失明也

金好色妻淫聲不賢內政

非禮迎

月金會好色主妻不賢反非禮婚

太乙若逢須庶出紫炁阿

母好通僧

紫炁阿母甚分明月配母身從母生身與李會又主庶出天乙相會母通僧道居

財帛陰貴成第三開極母康寧自身一世多閒逸棠
棣和柔好弟兄田宅位聳簷楹子息宮中是女星奴
馬金鞍招女使滿前侍妾好娉婷

疾厄無刑無疾厄遷移偏是好游行還居第十并十
一有官有福不虛稱戌酉未申見太陰巳兼寅亥喜
來臨宜圓宜夜宜三位入命多孤財祿深太陰入祥
月數加須榮祿位美奢華晝生淫亂無宗族金木同

逢宰相家

太陰不問入祥在高強宮與金木同行皆多清貴入宮淺者則官入宮深者則加減

以定之也

太陰晝生與火同不為奴婢必育聾更若主星居陷沒其家應少白頭翁○太陰未上最多昌若躔柳宿更高強生日若還逢着此功名富貴必無雙○太陰躔昴定非常壽永平生無禍殃切忌計羅并字照少年必定尅親娘○太陰居位乃強宮財帛榮華一世豐入陷閒宮憂母死金木交連命不終○太陰太陽

同宮吉太陰入廟主田庄三方若得齊生旺定知官
職至員郎○月孛對宮如旺夜必為臺諫肅朝簪更
宜夜火必高貴若遇土星刑害侵○月明本位當榮
顯廟旺應湏作傳岩更或旺宮同水順定居臺省到
朝叅○太陰圓夜若相逢更在高強廟旺宮三主陰
陽無背陷起身從此是名宗○月同歲德倍多情必
主初年得祿榮若在旺中居午上終看畫錦故鄉行
午乃祿
號之位○月居八煞忌相干豈是朝郎以上官怎可

失心居相貌若臨奴僕不堪看○天乙對同多益筭
發財兼水又兼金若還與水同宮位福祿之來必稱
心○月火分明入命宮金星巨蟹惡星同莫教留逆
還原守定要流徒不善終○太陰得地主科名官祿
文章世有聲年少必登龍虎榜高攀仙桂一枝榮

太陰殿局朝元

太陰在巨蟹宮金牛為本殿居子午卯酉為本局張
心危畢謂之朝元群曜叅奉曰太后受朝陰位值之

定為母位臨偏則尚為后若陽命受恩蔭之命太歲
值之或羣曜取次輔佐建旺秉權當得正位六巳生
人最佳

太陰躔宿俱出玉闕經玉闕歌

月躔角宿名天貴 學問淵源須大智

多才慈惠更溫良 夜裏生人最為利

角木蛟星度十三 月若臨之實可堪

不問疾遲并晦朔 喜同金木與相叅

月躔亢宿名天璣 富貴榮華人好異

平生歡樂足豐榮 妻妾顏容更奇美

辰為亢宿正金鞍 太陰逢此喜團圓

月曜金龍身瑩潔 珠沉海底水偏寒

月躔氐宿名天劫 性急多嗔又乖劣

日生兵火須逢難 若是夜生衣食絕

氐宿躔卯又屬辰 此宮月曜未分明

卯位相連氐土貉 月華晦昧失陰精

月躔房宿號天祥 文章學問更蕃昌

出衆機謀多巧計 平生衣食壽須長

太陰辰滯集于房 月兔移來日兔傍

鬪戰雌雄雖不決 於人那得有安康

月躔心宿號天驕 運用機謀智未全

少年未脫生涯計 如臨晚景始安然

心宿所屬在東華 月華到此不堪誇

大火既從心上盛 陰精安得不羞他

貴格云玉兔疾行心宿度
植圭端冕侍君王

月躔尾宿號天宗
勇智多謀膽氣雄

穿窬標掠心常有
見木方教免禍凶

尾宿天江月迥遲
有才多貌稱丰姿

男女多淫色慾重
秦樓盡醉不知歸

月躔箕宿號天財
冠古窮今學問該

但得對宮逢吉曜
文星得地應儒魁

箕位雖然本屬寅
寅宮箕位有風清

風散彩雲有明月 雲開又見月華明

月躔斗宿號天封 偉望威名學問通

君子逢之須得祿 小人逢此走西東

北斗經躔好月遊 瑤池貴就斗星求

斗宿同陰偏喜夜 月明斗夜向天周

月躔牛宿號天陰 作事施為要沉審

性直溫良少辛苦 纔過中年便安穩

太陰夜見至牛金 閑極宮中福倍興

私居財帛朝朝進 官爵名高日日新

月躔女宿號天寶 學識聰明多智巧

文章冠世少登榮 遷官必定居廊廟

女宿從來要陰精 陰精女位古同聲

若遇計羅來入度 太陰必定晦無明

月躔虛宿號天常 有貌才多更善良

衣食豐盈倉庫實 聲名閭里自揄揚

從來虛宿要陰精 月明虛地氣尤清

莫要土星來並照 月空尤喜月華明

月躔危宿號天文 宵襟磊落足經綸

為人玷污多巧計 圖盡機關行不真

月兔移來月燕危 平生懶蕩性虛危

格中升殿誰知識 恬淡純和福壽兒

貴格云太陰好處最宜危 男必公侯女后妃

月躔室宿號天鸞 形貌清奇富貴全

更得水星同位立 直須奏對近天顏

亥上本位屬天門 八萬三星盡拱環

月屬陰柔闕內室 陰來理內福彌專

月躔壁宿號天聘 語言蹇滯事沉思

若遇蝕神兼月孛 主須生長在寒微

惟有壁位正天堂 月沉雲漢有餘光

女有精神男曉事 夜生科甲衣金章

月躔奎宿錦肝腸 不勞餘力至員郎

更得吉星居十位 定應台輔見君王

奎為金闕正陽宮 月居闕內秀胸襟

須要正陽端在午 太陰臨戌廟中尋

月躔婁宿號天垣 旺廟之中福祿全

君子遷官居祿顯 小人衣食旺庄田

婁宿之中遇太陽 婁金狗吠月更深

平生作事多謀望 終是孤虛枉費心

月躔胃宿號天印 十度之中貴無並

更兼金木又同行 金榜題名官一品

月行胃宿怕逢金 九度逢之貴格深

合照更遭水與字 為人不免有貪淫

月躔昴宿號天光 平生官祿不尋常

聰明才貌超今古 異日須為給諫郎

昴宿屬酉正月門 此宮西位月專權

更有水星同度立 一生清貴富兒孫

月躔畢宿號天明 峻宇雕牆保萬春

更得金星來照助 少年及第不虛稱

月離于畢雨滂沱 身命逢之色慾多

閏

欽定四庫全書

卷十九

月躍軫宿號天理
勇智多端文學貴

少年辛苦老豐隆
赫奕聲名傳萬里

月如到軫是高強
一生清厚有柔剛

身命限中俱見照 龍池鳳閣佐君王

太陰行度

月在婁宿八度十八分以下為向廟以上及行木度
為正廟在胃宿一度十八分為背廟胃宿十度以上
至五十一分為正旺七度十分以上至十度為向旺
十一度以上至十三度八分為次旺以下為背旺巨
蟹為本宮若此廟旺樂宮生人並貴在金牛宮胃十
度外十一度內為旺度主居貴位若見金木又居有

力之地必為一品之官若雙魚宮及有力之地則為節度使若在辰戌之地與蝕神併居蝎則為凶盜之徒見火尤甚必不善終在無力之地見金必落風塵以婢妾為妻及奸通骨肉若在昴宿之間亦居極貴之地只旺七年若在蟹宮為好樂之地亦為木分之宮主貴若張氏胃女之宿及見金更在下位多淫及於男女好色慾也

日度主有貌多才足聲名為事方圓明白殊常有福

若是主星大貴婦人遇之大旺夫位

月度主形貌超群精神爽快平生有稱心之福每遇貴人見知巧言語多淫慾好女色

木度主足文學有殊常之福好經營多財產少貧老富中弱

火度主性急多災有兵火之厄一生為事卑賤少與貴人結交更有惡星同宮在官壽短吉曜加臨免之土度主一生多蹇若吉星助之更在月初大貴因妻

子有憂過三十二吉因妻有喜

金度主富貴有貌好歡樂有母妻妾王者委用多因
婦人災若是女人主荒淫

水度主聰明智慧有學問心下巧出入得貴人重

太陰入宮

日宮主好歡樂多病平生多福每遇貴人見重是主
星夜生富貴日生微福

月宮主性密口敏不是主星微有福力若是主星因

婦人富貴夜生足財有權位

木宮主稟性沉厚好慈善有威名多財祿是主星夜
生轉加福厚

火宮主為人性急多智勇見事不長平生與人結交
因此有厄是主星可免

土宮主性溫作事沉審夜生尤甚日生好女色平生
好訟性好殺足心機有詞智是主星微有福力不是
主星平生多災有善星照望則免

金宮主好容貌人知重巧言語多情慾得婦人敬愛
謀事多成一生得暗昧財物

水宮主性聰明為人有行多智見好文章有聲名足
財產夜生輕巧會文章好圖畫不貪多被人玷污

太陰同宮

月木同宮主文學出眾更得大貴人見知若二星有
一星在旺樂宮有科名當清要任為給諫大富貴

詩斷太陰惟木便相會 玉骨冰姿謫仙隊

男主封侯女貴妃 百六如當足祥瑞

木月居命不為僧 縱然為道也無成

只是幽閒高處士 須攀桂籍有聲名

月火同宮主性急多惹人暗地是非是主星有位非
主星多災有善星救則免亦主被惡人累及性遲鈍
因繼女有厄男娶得富妻女稼公侯壽至中年有祿
語澁

詩斷太陰熒惑喜相逢 智將謀臣著顯功

天產其人為宰輔 如當百六慶無窮

太陰若被火相逢 一寸資財散落空

母賤父亡兼壽短 為僧為道也無終

月土同宮土是主星有學問身貴晝生福厚貴達夜
生微福不是主星多災害言詞蹇澁性純夜生作事
淫濫主缺唇母有疾

詩斷月土會遇火為災 偏產頑愚性質呆

百六會時人天喪 忠臣失職竄天涯

月金同宮平生多與婦人結交每被婦人相撓不是
主星作事無定宜防婦人相損婚晚多情欲有貌志
氣高

詩斷太陰金宿喜相交 百六逢之慶瑞色

天產其人扶社稷 官居裂土與分茅

自來月要與金同 食祿須知得位崇

若是當生為土犯 斷然父母兩三重

月水同宮主性格溫厚和睦持重若水是主星文藝

出衆得國王重用好論訟女人有厄木見則免

詩斷月水相逢慶瑞饒 人生遇此賦天才

溫純德厚榮尊爵 百六當之福祿來

月羅同宮必主貧賤妻棄子逃日生多招刑法夜生
猶可不宜母

詩斷太陰天首喜相隨 智出鷹揚塞外威

莫教望時生叛逆 禍臨百六可愁悲

月炁同宮主大招衣食醫術顯名

詩斷月炁文章一世豪 為人志氣冠吾曹

母壽靈長兼清雅 官班超轉職崇高

月炁相逢最奇祥 福被生民慶且昌

萬福攸同逢百六 人生值此必侯王

月計同宮夜生招獄訟 日生猶可不宜母月孛同宮
亦然

詩斷太陰在望計都同 爰產奸凶不孝忠

不在望時終有怪 投河毒藥或瘟逢

琅玕經節要

月乃陰曜福惠之星主方夜照職祿尤增月圓高宮
顯任威治如同金水益財益位木與月同大為福會
天乙對同壽筭高至字月對同才術可委夜重晝輕
所應有異

太陰宜見炁木二星主性仁敏名高才邁清幹之人
亦宜字夜照主廣記博覽才性宏遠動達尊貴更居
廟旺給諫功臣

土火月同得失可議

夜同土星必招刑害風狂夭壽之人夜同火星雖有刑尅則享福祿若安廟旺則主大貴

羅計月同亦為災障

太陰好行靜道逢羅計則有交蝕其光不顯却為災障若月在於廟旺減其福祿貶官失祿如居常度又值殘晦則犯刑遭法尅害尊親妻子多刑家道不立親近惡黨恣行兇暴如若逢之多不廉矣更加火土

字逆則為惡死之人如得吉星救之亦帶疾傷殘而不善終

金木逢之招其福祿與日同宮顯於名望

太陰照臨十二宮

命宮

守照命宮形貌清古體不重肥面方神足骨秀色清性明急嚴緊能幹身孤力寡或假親戚倚其勢力臨事憂勤不倦足慮多權最宜為商財產失而有成心

力能當重事設在窮途亦能成立最喜夜生足財足
祿生在廟宮大貴主福祿全備享福溫煖為人俊雅
作事善良心懷矯曲結交無終始修學有科名小人
衣食不招凶危日生逢火難為母主風狂溺水夜生
逢土口啞缺唇在無力之地見金為風塵婢妾與火
孛炁同守命宮損父若有水助主風疾逢月孛同計
都主尅母在陷宮加凶星難為母金木相當生來少
疾秦趙宮中金星助月少年及第

詩斷月照人無俗

多孤自有成

掌財宜市賈

託貴有權名

明急招言妬

妻良贅可膺

若能圓夜照

財祿自興榮

太陰偶臨身命宮

更無刑剋起災凶

四元三限同強位

看取封侯列土封

太陰逢炁起災迤

計字交加又變嗔

夜裏生人難際遇

遇之名字播天門

太陰陰滯多淫欲 行度照臨頻受福

遲留伏逆上推尋 入廟天厨分得祿

財帛宮

主財多耗散得貴人力會祿馬者有積聚多財寶

月照一生近貴人財帛亦主得福人財寶成立

詩斷太陰得傍命宮排 事起陰人大得財

若見忌星相破犯 必因奸盜此中來

月居財上福為深 更加廟旺足珠金

蝕神若不相照視 縱有災星禍不侵

兄弟宮

有壽有財不宜母兄弟難為凶曜同照有亦不和却
多姊妹主良善福德之人○月照主兄弟可保一二
人之力

詩斷第三宮中號玄虛 星曜臨之力轉踈

惟有太陰當此位 命中福祿乃贏餘

太陰反為福德星 只為加臨到弟兄

金水太陽同一位 亦知天下有文名

田宅宮

主招外產置立田庄必命有吉星方能發祿如逢凶
曜多貧窮加羅睺尅父加紫炁尅母流字破盡祖業
又有自縊水厄○月照主高貴宅舍大招田宅產業

詩斷太陰火星同到午 雖是過房猶尅母

若是金木與同行 子孫榮貴着金紫

太陰照曜若相逢 自立榮華萬事通

又招陰貴增財力 遷移三處振家風

男女宮

主身近貴得一子力不然義多值羅計同尅長子○
月照先見女宮

詩斷陰偶臨宮識者稀 得臨子息愈為奇

不惟長子無刑尅 更見高高折桂枝

長子如何多產女 只因月與命相依

命裏逢之多是吉 何況此位更逢之

奴僕宮

主尅母見金奸通骨肉得小人力若金與祿主會者
乃專貼典吏背祿馬者乃卑賤之人○月照主招鞍
馬有得力女使

詩斷陷方奴僕最凶哀 陰偶臨之母不宜

仰念劬勞恩至大 空持甘旨泣慈闈

為官侍從多車馬 三合太陰出六宮

若是土星相對見 左右相隨並罔功

妻妾宮

主妻良善美貌端正有財益壽金牛宮大吉會月孛
妻血疾并生離吉星救免主作贅壻○月照主貴相
之妻反因妻家發旺

詩斷太陰西沒最為佳 明淨之宮無點瑕
更若尊星相對望 必生貴子佐皇家
夫家有福婦家貧 只為孛星加太陰
自因夫婦和柔了 恰主浮生既有塵

疾厄宮

主好潔淨土同主目疾獨見可免值凶星主惡疾更
加惡曜疾病尤甚必主一疾壓身終不能脫○月照
主平生少疾吉有壽不犯天災

詩斷太陰臨主八宮存 畢世災危杳不聞

忌曜莫教同此位 雙眸渾似月遮雲

太陰加臨疾厄宮 太陰官祿足為凶

父亡母存母又嫁 隨母飄飄西復東

遷移宮

出入利見大人得人輕重巨蟹宮三倍力加吉星主
有官職亦宜財富如見計孛惡星一生孤寡多刑及
生離死別吉星救減半○月照一生好遠遊常得他
方道路之分

詩斷太陰得在九宮中 三合加臨照命同
偏利遷移商賈客 必因陰貴得財豐
九位遷移犯太陰 父兄纔死便窮貧

對位有星相救助 方道貧家在富人

官祿宮

主少年近貴無官災君子有祿小人衣食會惡星主
徒配會吉星祿馬主有科名而貴○月照大宜奉公
若有官厄常有恩赦之救

詩斷太陰官祿作身宮 水火同行福倍隆

李計不逢功愈重 貴因戚里得侯封

身居官祿不尋常 福德星辰入命鄉

廟樂不曾刑本命 為官須坐紬衣堂

福德宮

為人性善心慈有福德大富會吉星主孝順會凶星
心惡暗羅在三合宮主一生暗昧祿馬皆陷為事無
成雖有權星臨於祿位不能貴○月照多因福人持
挈立身高上

詩斷陰偶來臨福德宮 雍容道德貴尊崇

更有吉星臨木位 生長皇家族派中

月居福德最為妙處世為人足有餘

一生輔弼當明健為官獲福在參厨

相貌宮

形貌爽朗清秀主富貴聰明○月照主形相具足多
被小人相輕不可與下等人作事

詩斷相貌太陰仍孛星羅喉同位最相刑

兵部牒中著名字末年財帛振英聲

三日宮中看命星命中吉德最為榮

忽然忌曜來侵犯 甘旨空持泣母親

太陰變段星

寶瓶宮天后星○又名天皓星主明健湛寂也

詩斷太陰子上為天后 女貴男榮畫主權

多缺多盈逢望晦 三宮得此母長年

磨蝎宮瑤池星○又名天皓星主清閑之福也

詩斷太陰元來水之母 丑是瑤池佐君父

遇望英明至下弦 女則金冠男台輔

人馬宮陽明星○又名天馘星主事馘毒多後悔

詩斷陽明寅上曉星臨 日出扶桑溺太陰

遇夜生人尤減福 日生滂瀉乏資金

天蝎宮桂影星○又名天車星好遠行得衣祿

詩斷月宮桂影仰扶疎 對照西華畢月烏

二十八宿皆仰月 周回萬里沒差殊

天秤宮始晦星○又名天關星女過之孤房也

詩斷辰中始晦月無光 對望宮中怕太陽

火土計羅臨照視 英雄難保少年郎

雙女宮陽極星○又名天暗星主女人暗昧欺罔也

詩斷陽每極時陰未至 月臨雙女蕩非常

女逢忌曜多淫蕩 男是貪花卧酒鄉

獅子宮朝陽星○又名天暗星主得女子橫財

詩斷月內金烏躔柳宿 正臨離位失其明

夜生朝北身榮貴 身近君王雨露恩

巨蟹宮玉魄星○又名天福星主福祿貴達也

詩斷井鬼宮中月喜躔 未中玉魄壽長延

女人邑號身長貴 四正宮逢祿位遷

陰陽宮地弼星○又名天官星主文章貴顯

詩斷宮屬陰陽遇太陰 不宜背宿只宜參

參是水猿猿笑月 一生才學貴人欽

金牛宮玉樞星○又名天後星男貴顯女難言

詩斷月到金牛號玉樞 少年必定飽詩書

三方盡在高強位 一世優游在帝都

白羊宮歸朝星○又名大道星主妻不賢潔也

詩斷太陰元后戌歸期 總領羣星上玉霄

只怕日生逢首尾 為官晚景却蕭條

雙魚宮執壘星○又名天晦星母不賢潔本身福祿
佳

詩斷雙魚執壘太陰星 月到中天分外明

忌曜不侵須富貴 水金相照有佳聲

天乙紫炁星

總龜算法置積日減一千二百八十八以一萬二百
二十八數除之不盡者為殘分轉一當十以二百
八十為一度二十八為一分次下除為秒

平行一日行三分五十七秒

紫炁論

天乙紫炁星續木之餘吉祥之曜也一名景星乃天
華蓋之氣百川霧露之源又名道德之星順行天輪
或隱或見其行宮度一日行三分五十七秒一宮住

二十八箇月二十八年行一周天行道有黃赤之不
同喜怒之無定此星名太極文昌之星山遇此炁服
藥有冲天之人海遇此炁水族有化龍之象國遇此
炁則明君出郡遇此炁則賢人生枯木得之變生蘭
蕙蚌蛤得之能出驪珠照人身命則富貴雙全福壽
備足仁慈道德心孤好善能解字計之難善救火土
之厄

辛生人以為祿主星

甲生人以為蔭星

乙生人以為魁刑星

丙生人以為貴星

丁生人以為印星

戊生人以為耗星

己生人以為權星

庚生人以為暗星

壬生人以為正福魁星

癸生人以為囚星

此星廟在丑旺在亥好在寅樂在申午戌宮安皆喜
惟未為怒

琅玕經云炁星牛斗最為珍福祿崇高上達人室壁
星臨超職位尾箕應出貴豪倫申宮得見招財祿午

戌相逢富貴身身命限中如見照益財恩祿有相親
○經云紫炁元是木之餘紅肥清白少髭鬚同金同
水皆為貴木若臨之福最殊○此星天上文星行年
及身命限得之學者春秋必逢補中小人見此一歲
無憂凡事所為吉無不利如遇科舉之年得臨命限
定主秋闈一薦必騰萬里之聲金榜高登直透三層
之浪然亦不可一概論須當推詳命中原守星得力
然後看洞微限如遇忌曜則為不吉若為方主反凶

成吉遇炁限者功名成就凡事稱心行水限值之亦
吉一年顯達○經云紫炁不來難發解任他才學有
高聲奈何金榜無名字只為此年無此星○若與太
陽同在金牛巨蟹宮為福甚緊皆主貴位若不居樂
廟之地在餘宮照人身命主為性緩慢多為九流之
士好耽釋氏為福亦甚薄與木月同宮在命主性清
高兼有貴勢多愛奇異畫生母亦長年紫炁天之喜
曜性頗類木好清閒淡靜所臨之處只與人為福不

與人為禍偏樂與水木日月同宮為福緊也獨行更
陷在辰戌丑未四位為福甚薄宜仔細推詳

紫炁歌

紫炁眾星中最善形相分明人仰羨心懷仁義性溫柔
作事與人為方便無妬毒多謹愿少病利官長壽筭

紫炁在命主人慈善形相分明性溫柔有仁義作事愛人方便心無毒少病利官有壽好耽僧

道立身孤舉措施為慵更懶紫炁在命好耽釋氏孤立性多慵懶日月

近貴作間人月會母親先化幻與日同近貴為僧道閑人月同尅母夜

火同時醫與巫土木更來尤懶慢

與夜火會主巫醫與土木會主慵懶

金同妻妾是娼尼水會智能稱俊彦

與金同妻非娼則尼水會有智

能巧技

彗星分得賊人財天首僧尼訟爭戰天尾星同

有機變

與月孛同主分得賊財與首同主因僧尼爭訟與尾會主機巧狡猾

財位橫來

財寶現三宮姊妹或為僧四處廟田主巨萬

在二宮主橫得

古器寄陰財寶在三宮只招姊妹兄弟為僧尼四宮巨富

奴僕門下出縑流子息

須知女先見

在六宮主有僧道出身門下五宮先招女子

西沒宮中妻密

情更與別人情似線

在西沒主美妻與外人通

八宮終不染時災

官位不曾見州縣九宮遊賈福宮開相貌為人性良
善

紫炁見木木見土或為正限或臨之相逢必是聲名
貴此曜元來是紫微○九星惟有字堪畏為福全然
歸紫炁跳位臨宮廟次佳其他災福有定議○紫炁
若與財星至當主資財一等奇只恐早年多破散不
然妻妾主生離○未人申上見紫炁重疊逢生主清
貴孤辰隔角并宮行母死父亡進田地○紫炁躔宮

到磨蝎要於月上推圓缺圓時清秀有財糧缺處伶
仃多破滅○亥上紫炁到雙魚若是陰人祖業富重
疊逢金尤更嘉一旦文章定遭遇○木紫同逢亥子
宮高強衣食大昌隆水入旺方逢紫炁子孫清貴富
家翁○庚辛之年紫申酉初主奔波人物醜貪色貪
財更貪盃又因娶婦旺資財○紫炁居前後有日若
臨田宅尤為吉月字計都同共來老去令人貪女色
○天乙多為應夢奇紫袍呈瑞是佳兒若躔廟旺凶

星避的是留侯作帝師○流年若與炁相逢種種為
祥不解凶舉子遇之須發薦仕途得此必官隆○當
年炁炁若臨身下筆驚人似有神帝座木星同照着
終須富貴作朝臣○天乙躔牛是福基性高行直更
心慈若教陷却三方主縱使為官只奉祠○天乙從
來主大孤命如逢着莫狂圖三方不向奇星陷斷取
緇黃即是渠

紫炁臨喜怒宮

喜宮為太極紫微文鳳清福星若照身命主性清潔
為人溫厚清閑或照官宮更會吉星當為六品之貴
若無祿馬只作中福人 怒宮或為天女天虞星天
會天匱星若照人身命無救星多主出家及在人
第七宮決然為僧道若是庶人在陷宮見之必尅害
妻子顏色烏黑有救星則主清貴

紫炁躔宿俱出玉闌經玉闌歌

炁躔角宿號天休 機智清閑藝術優

僧道逢之多吉慶
庶人不繫若虛舟

紫炁臨人多殊異
角木蛟中主尊貴

僧道章服庶人財
職司之人增祿位

炁躔亢宿號天僮
性善文章藝術通

不獨為官并富旺
神仙樂道福無窮

貴格云紫炁若來角亢方
萬里台星光爍爍

炁躔氏宿號天環
雲水留心自得閒

耿介孤高人自傲
為人只是好居仙

紫炁來氏不十全 雖為財庫壽之源

計土火羅同入度 災多福少不當言

炁躔房宿號天衝 平生清福有誰同

道釋白衣好消息 資財衣祿却豐隆

卯中有宿名為兔 紫炁正樂房三度

榮封妻子祿超羣 又且揚名益宗祖

炁躔心宿號天德 子孫雖有終須尅

儒學釋典自能通 玄象天文須會得

心宿大火在東宮 炁曜來居怕火逢

紫炁本無心上火 炁藏心火必爭雄

炁躔尾宿號天嫵 心性豪強尅子孫

謀畧威權心莫測 聲名忠義播乾坤

尾星好炁在寅宮 寅位東方炁曜雄

盖炁好行東令首 仁慈尊重少災凶

炁躔箕宿號天循 智識機謀果毅深

性直文章聲遠播 貴人相遇有知音

箕星本在木宮居 誰知炁屬木之餘

此曜好淫為入廟 箕風好動炁終虞

炁躔斗宿號天斛 飄然孤潔為清福

文章忠直外安閑 朋友柔和衣食足

斗為帝曜自尊嚴 炁宿相躔福祿綿

此位偏宜道德曜 得居星斗是朝賢

貴格云天乙若臨南斗方 尺璧寸珠未為寶

炁躔斗宿號天輪 尊重清高害六親

金火逢之官顯赫
如逢木月富豪人

牛星從來正丑親
炁朝北位近嚴宸

大抵牛星傍斗立
牛逢炁曜德惟馨

炁躔女宿號天瑞
耿介孤高性獨明

但得吉星居十位
必為廊廟福蒼生

女星雖是子丑宮
炁來此地木堪逢

炁得女星雖樂好
女陰炁味不相同

炁躔虛宿號天文
清秀為人近至尊

骨肉難為自孤潔
達人僧道樂平生

虛位躔宮在北辰
炁來望闕正朝真

湏是獨居方有福
更逢土忌不相嗔

炁躔危宿號天僮
為僧章服貴人同

談天玄象心明悟
樂道逍遙善事叢

危星亦在子之宮
炁曜來躔福不隆

炁係木餘無旺子
炁星危曜不安榮

炁躔室宿號天玄
道釋儒流性自然

經術從來胸臆悟 文才洞徹事神仙

天乙來臨室火猪 此星無憂木之餘

不值空亡孤貧地 福高貴壽富難如

炁躔壁宿號天覺 機智文章更多學

更能籌筭悟天機 舉錯施為應不錯

炁星到壁事相和 妻子逢之有難多

最是清孤偏尅陷 若為僧道却無磨

炁躔奎宿號天乙 性直忠良又煩急

平生多是不安閒 不受人欺財聚積

奎星漸屬戌白羊 此星炁曜主權綱

炁若躔奎珍重德 德星珍重自相當

炁躔婁宿號天虛 為人孤害六親疎

緇黃自是平生事 衣食清閒一事無

婁宿莫要炁來臨 金狗相逢炁不清

此曜要行清貴宿 婁金狗與炁相刑

炁躔胃宿號天音 衣食生來却稱心

妻子宫中難聚會 四方交友自同襟

胃星本是酉戌初 戌位同躔烝有餘

酉位火沉無猛曜 此星柔順要西居

烝躔昴宿號天端 為人崇重命孤寒

情性耿介難侵犯 忠孝家門百行安

昴中正屬金中臨 烝依金牛道德純

此曜孤辰躔昴位 妻兒孤獨福間人

烝躔畢宿號天吉 天乙居中加福力

為人清秀善為心 官祿星扶進爵秩

炁曜名為華蓋星 如臨畢宿酉和申

十六度中皆喜旺 最宜坐命與安身

炁躔觜宿號天福 衣食安然勝僧道

金玉財寶自天來 妻子難為終壽考

觜星明處炁來遊 必使君王早夜求

更是官星兼祿主 布衣何慮不封侯

貴格云天乙最宜躔在觜 極品官資性至慈

炁躔參宿號天瓊
為官終是貴遷榮

幹直忠良參相位
文章事業擅西清

參星偏要炁同行
炁臨祿位必公卿

道德要逢西位立
炁逢西旺必安榮

炁躔井宿號天令
文武兩全才更敏

參樞給諫盡功臣
官職崇高年壽永

井宿雖是未宮中
炁要恬居愛井逢

蓋井深沉太乙靜
女尼男道自心聰

炁躔鬼宿號天榮 積善之家有此人

富貴崇高聲遠振 官途超越旺門庭

鬼星年位要炁星 炁屬木餘入廟深

此是陰居宜炁靜 金羊偏愛炁金臨

炁躔柳宿號天平 好靜溫良免禍生

衣祿平平無破敗 子孫終是不相親

柳宿本是午未宮 炁躔兩位更英雄

炁入柳宮同廟樂 一生清貴不生凶

炁彊星宿號天強 命中若遇定孤孀
財旺家門自興盛 若為僧道壽延長
紫炁行宮入到星 名彰祿至照人榮
羅喉同度成勲業 位顯官崇台鼎臣
炁彊張宿號天芒 尅陷妻兒命裏當
縱有高才心又急 晚年方可免恓惶
張宿好與炁同宮 炁若同時必主聰
惟有張星偏好此 月鹿喜有壽星逢

炁躔異宿號天牢 命宮若值定孤高

生計為謀多費力 若為僧道自逍遙

翼星漸入雙女家 已火燄燄炁咨嗟

炁柔不旺在雙女 翼躔此宿困天涯

炁躔軫宿號天嗟 子孫足處定迍車

命若逢之身獨喜 此人衣食少寬懷

紫炁軫位雖孤獨 身命若逢多發祿

煞不能入禍不深 吉曜終與人為福

紫炁入宮

天乙室牛為旺箕為樂觜為廟居此生人得大人敬
重常近至尊惟宜見金木火月為極貴入宮親密之
任旺二十四年見水月好奇異書見金火急性居官
顯赫好神仙之事在僧道宜章服在陷宮有水月金
火亦為貴人

日月宮主為性緩作事方圓好藝術有慈心因道藝
成立後乃富貴水木宮主為人性格聰慧智量大有

心機主富貴

火宮主性格慈惠文武異常見文習文見武習武更
諸星居有力位大貴

金宮主好兵法有謀畧得貴人擢用若諸星在強宮
生旺主有位土宮為人有信作事方圓有聲名好文
章三主星居有力位必有典郡之權三主在稍高位
定主大富三主在無力位亦主微福

紫炁同宮

炁日月同宮得父母力近貴人

詩斷太陽紫炁會相逢 澤潤生民稼穡豐

百六遇時祥瑞盛 人生遇此會三公

月炁文章一世豪 為人志氣冠吾曹

母壽靈長兼清雅 官班超轉職崇高

炁金同宮主得貴人女為妻女人愛慕在臨害宮主

有妨害

詩斷金星相逢紫炁星 禹門先躍化凡鱗

威加夷狄為良將 燮理陰陽輔帝辰

炁水同宮主有聲名足文章居清華之地大富貴

詩斷水星紫炁會相逢 天產其人福勢長

官爵顯榮家又富 千斯倉與萬斯箱

紫與水星能作善 厚德純性學神仙

醫卜技工多文藝 一生福壽兩綿延

炁土同宮主為土地之官好神仙之事長生之道

詩斷土星紫炁喜相依 冠冕榮身爵位巍

丹赤之心剛且毅 德延萬里足光輝

炁火同宮主宜服色心卑下火星順行主福祿宏遠
炁木同宮主大人舉薦之力亦主貴顯

詩斷紫炁不來難發解 任他才學動公卿

寄語才高須要命 不用頻頻祝上清

木星紫炁福豐隆 百六逢之慶不窮

更在廟宮陰德重 官為師相位侯封

炁羅同宮主器量宏大雄貴顯祿

詩斷紫炁羅喉喜會同 人生剛毅抱英雄

揮戈却日平姦虜 笑取勲名反掌中

炁計同宮夜照主文學畫生多招凶險成敗尅害事物

詩斷紫炁相逢見計都 家多粟帛富庄租

廟宮人值貂冠任 百六逢時萬禍祛

紫炁計都同一位 復定經中尤為忌

命宮逢此災不輕 若見身宮最難避

炁字同宮主足謀多慮能掌兵機職任清高

詩斷蹇薄皆由字紫逢 離鄉背井道途中

多情色慾仍為盜 千方百計也還窮

琅玕經節要

紫炁天乙福貴之星官高遇善福祿彌堅金木同宮名
望之重各臨旺度明君委用星行順旺清貴之職可領重
權久而不失日月同之助其福祿初度加臨大為榮旺

炁同日月多助其福更在初度旺宮身名榮達如主不

順遇蝕神即為僧道術巧之人木祿不背

首羅同行職祿殊勲臨於旺樂偃武脩文炁同享計足
謀多智夜逢貴旺文權武畧若是日逢多主興廢

羅暎日曜宜日生計都陰曜利夜生文武全備雄貴
顯祿反此則招險厄成敗尅害之重

日土順行財業豐富或旺或廟引從旌旗

土日同宮順行主富貴有名望若在廟旺貴權節帥
官祿顯揚子孫超卓無不榮貴

天乙火同福祿則重火順宮吉職叅侍從旺水逢炁
廟招地利或道或僧或儒或藝處衆多通樂於遊說
時命運逢迎恩被荐起發聲名官有權治

紫炁臨照十二宮

命宮

守照命宮主顏容尊貴不肥重骨節柔長性敏多通
臨事有斷博通畏事為事善良性情慈善出衆尊重
仁慈道德一生好靜大利僧道孤害六親惡曜刑破

處世孤貧見金木火月為極貴之人居親密之任見
金火急性居官顯赫及好神仙之事見水月好奇異
書畫更得諸福星在強相扶必大闕此星名諫善○
木土同入命宮謂之紫微垣○炁月同入命宮醫卜
顯名計字同入命宮主因酒色犯刑

詩斷紫炁臨命照

身高財帛低

初年六親散

後運總相宜

紫炁文章最吉祥

照臨身命福非常

更鮮諸凶明道德 庶民僧道亦安強

紫炁臨宮學冠倫 如臨暗曜號孤神

雖然不是天庭客 亦作禪門第一人

財帛宮

先破後成○炁照多因行業有藝財之分

詩斷老陽紫炁木之精 道德尊崇性最仁

在此弱宮安吉曜 破來財帛更豐盈

羅孛同來到第二 早年學博仍謀利

博主多輸謀利空 直使中年大昌熾

兄弟宮

得貴人朋友力 兄弟雖有反目無情主相分離○炁
照合有貴相兄弟

詩斷炁來臨兄弟時 孤星却主兩分離

雖然時暫同相聚 反目無情性不比

田宅宮

宜仕宦主父母長壽○炁照一生增進父因子孫榮

立

詩斷當生紫炁四宮行
福蔭兩親保壽榮

看取耆年精力健
都緣強位老人星

紫炁居臨父母宮
寬懷雅意福須隆

若居廟旺無相尅
外州庄產積盈豐

男女宮

見子晚此乃孤星早則傷害除非妻子命有此星相
抵則可矣○炁星合貴女之分男可保一人之力

詩斷炁星來照子孫宮
穎悟聰明更美容

邁祖超宗榮貴顯
家門昌盛永無窮

孤星孤炁一人加
聰明超俊足奇誇

只恐前祿來保守
衣色冠帶耀吾家

奴僕宮

奴馬多聚會○炁照大招奴馬因小人發祿有結交
之分

詩斷解除災厄保康強
紫炁來躔最吉祥

奴僕小心多戀主 田蠶進益富倉箱
僕馬宮中紮炁星 孤高落陷不為情
成行奴僕難留在 飲膳區區自煮烹

妻妾宮

妻妾方可保守○炁照多恃妻妾之力

詩斷壽星得在七宮會 妻妾歡諧多發瑞
官高職顯侍宸垣 華胃家風應不墮
妻妾五位怕相逢 必定須防見尅凶

若在命宮及官祿 方袍圓頂或孤蹤
有妾有妻事匪他 只因紫炁字同羅
縱有三妻并四妾 淫聲妬嫉不調和

疾厄宮

生來少病

詩斷疾厄只防多疾病 若逢紫炁却成祥
為人酒色多無說 只為星辰坐太陽
解厄脫難最雄強 紫炁生來免禍殃

道德日增君子泰
超羣發秀筭延長

遷移宮

遷官居顯職亦主貴人接引○炁照食他方之祿得
高上慈善之分

詩斷炁炁迎祥司大福
常人得之財富足

何況三合臨遷移
趨侍宸垣享天祿

第九宮中有壽星
堂堂眉宇及精神

豈知天上清高宿
下照塵寰有道人

官祿宮

當得貴人妻用○炁照一生不犯刑名縱有官中大厄自有解脫不成大害

詩斷壽星錫福最為奇 官祿強官喜遇之

家世綿綿增異福 員郎卿監又何疑

紫衣師號九流人 官祿宮中紫炁星

若是木人兄弟取 任他清貴亦無名

福德宮

得男女力○炁照受高上福德主有大富

詩斷福德文章紫炁星 照臨福德最為珍

壽齡永遠豐天祿 特產賢英異世倫

俊雅超羣紫炁星 來居福德祿兼榮

顯達必然三主應 為官定是作公卿

相貌宮

好神仙事○炁照性慈有恩見事和平受人倚托因

寄附損財

詩斷相貌宮中紫炁臨 精神瀟灑倍安榮

如何晚景身輕健 必是當生作壽星

紫炁變段星

寶瓶宮紫宸星○又名華蓋星主為九流僧道之人

詩斷紫炁紫炁號紫宸 吉宿同臨作輔臣

孤寡空亡閒極位 僧道孤虛技術人

磨蝎宮福德星○又名天瑞星主貴祿榮顯

詩斷炁為福德丑中宮 正廟生人貴顯重

更得吉星同會聚 必為官品至三公

人馬宮太虛星○又名瑞光星主得空亡九流人橫

財

詩斷寅宮紫炁最超殊 入樂居垣號太虛

命位德官雙遇着 少年官職達亨衢

天蝎宮天樞星○又名天和星技藝巧術智能

詩斷天樞昂位炁星臨 此曜逢之福且平

但要木星諸吉曜 同臨此位福高人

天秤宮地庫星○又名金櫃星主財祿官榮也

詩斷紫炁文星若到辰 馳名地庫自豐榮

再遇木名垣局內 文章學問更聰明

雙女宮天始星○又名紅鸞星主近帝位前

詩斷天乙星臨雙女躔 初年孤滯晚安然

更得木星同合照 一生常近帝王前

獅子宮天津星○又名天孤星主鰥寡孤獨

詩斷紫炁天喜臨於午 此號天津必有涯

富貴一身人莫及 子孫榮滿祿尤遐

巨蟹宮曠目星○又名天潔星主事清潔

詩斷未上紫炁名曠目 多主災殃無福力

除非祿主在高強 亦要同宮會木日

陰陽宮十福星○又名瑞已星帝王擢用貴權

詩斷申宮十福炁星名 樂位逢之富貴人

縱有惡星臨着處 也須受相定尊榮

金牛宮天旻星○又名瑞相星文藝技巧之能

詩斷酉宮大乙號天旻 廟地行為上達人

更得金星來助月 高強必主壽長春

白羊宮天盈星○又名天乙星主僧道儒流


詩斷白羊所喜為天乙 位號天盈穀滿倉

若在七強為福緊 早年登第入朝郎

雙魚宮天解星○又名祥光星主祥彩得古寶橫財
也

詩斷天曜雙魚天解中 一生謀運足亨通

五七宮中妻子貴 只憂傷尅的難終



星學大成卷十九

欽定四庫全書

子部

星學大成卷二十

詳校官監察御史_臣邱庭澍

靈臺郎_臣倪廷梅覆勘

總校官進士_臣朱鈐

校對官中書_臣潘庭筠

謄錄監生_臣李崇實

欽定四庫全書

星學大成卷二十

明 萬民英 撰

三辰通載

太乙月孛星

總龜筭法置積日加一千二百三十五以三千二百三十五大數除之商數一千五十列上位其餘不盡者為殘分用七因之上位商數以二十一因之加八

下位以六十二為一度不滿者不入分關平行一日
行十一分二十九秒

月孛論

太乙月孛星屬水之餘天暗之宿也一名彗星一名
妖星一名天哭毛頭星隱行於天其行宮度一日行
十一分二十九秒一宮住九箇月九年行一周天行
道有黃赤之不同喜怒之無定喜則為少微星怒則
為彗星此星出現使眾曜無光羣星失色或入南北

斗中或入太微宮或犯天闕國須有災所主分野郡
必有災人民饑饉流離其方若兵興將死兵亡

乙生人以為祿主星

甲生人以為暗星

丙生人以為權星

丁生人以為囚星

戊生人以為印星

己生人以為刑星

庚生人以為催官星

貴星

辛生人以為蔭星

壬生人以為耗星

癸生人以為福星

此星廟未旺寅好巳樂酉喜申順子怒戌

琅玕經云命與身宮字照時柳躔初到最為奇諫官御史元相稱兵寄文衡又所宜富貴可期經翼軫聲名當發在虛危更臨身宿直難者最喜陰方夜見之○此星空與人為福多與人為禍若乘柳梢旺度之分善星相會便作大官命斷之縱使為官亦為歇滅又最忌金星同宮亦主尅害妻子○經云欲問榮華及好妻生來太白順遷移若逢對照家無子那更同宮被字欺○賦云尅妻害子太白與月字同宮○又

云妻無子息都緣字在高強推星者宜仔細消息無
有不應君子得之在命亦喜劍鋒同宮乙未人劍亥
鋒卯巳酉人劍鋒俱丑乙亥人劍卯鋒亥巳丑人劍
巳鋒酉乙卯人劍未鋒亥巳巳人劍酉鋒巳此煞在
命專主權柄在妻損妻臨子害子○經云劍鋒之煞
細推詳又臨身命最為良執卷之人湏及第釋衣道
術足財糧惟有小入全不好會教早夭法場亡更被
天刑伏尸制投河自縊眼無光此星吉星名福煞百

人逢之百箇昌若更盡傳真言訣合用金銀數十兩
○六乙生人字為正官祿星月字星同宮不為凶惡
之宿

月字歌

彗星威烈形似墨眉目精神光灼爍

闕

猛少言

詞膽氣龐雄性惡能運謀多禮樂最有機難測度
財多聚散一身孤父母家財多索寞金牛巨蟹及雙
魚寶瓶宮中好安着堂堂容貌有威權富貴崢嶸人

驚愕日月會事安着父母凶狂先蓋廊木來必定助
威權金會貪淫妻愛謔男為巫術女為尼水到穿窬
入樓閣土火亂世號英雄紫炁更能脩合藥天首會
好劫掠天尾法場世拋却居財盜賊破家資兄弟妻
宮難檢約疾厄腸風內主災西沒之位妻喪却官宮
凌辱天天年十一宮中偏福薄陷宮十相不曾全依
此推之終不錯

九鬼惟有字堪畏若到南方宜向未未前中後坐太

陽一生名字播馨香○獨行尤可免災迤切忌相逢
首尾星或更同居高強位不為人害定遭刑○孛星
最喜入秦州為官作事最優游平生食祿無停歇佩
玉腰金侍九旒○與水同行更處閑或無吉曜去相
叅限中更若來臨照男作偷兒女必姦○子午孛星
喜在寅亥申依舊主逢申寅申兩位孛星列子孫榮
貴佐明君○巳未二方逢月孛九流飄蕩多出入直
饒入廟雙女扶只是終身足衣祿○莫以此星為大

忌除却寅宮偏喜未更得太陽相逼夾兄弟絕無有
田地○子午還歸子午位若在弱宮方可喜元來富
貴亦尋常亦主高明通性理○丑人不喜孛衝年雖
居廟樂禍連連遲留若向申辰上媒保得財仍得田
○太陽若與孛同宮第一陰人不可逢丈夫陰德并
疾厄偏因好事傷財帛○太陰本自有虧盈為福為
災無定形若見太陰與月孛母亡父喪惹官刑○生
時孛在柳躔間更把官星仔細看三主若居強位上

勇冠丰采爍人寒○太乙人加惡曜名逢之多說禍
非輕如何却有榮華者在廟因為鈴轄星○威權本
是將星高好把功名屬汝曹不被凶神輕犯破也須
鄉社作英豪○孛星不得善星扶如虎如蛇毒有餘
男命刑妻非一室如云女命亦三夫○孛同天尾火
宮行木土金星陷不明命主更居無力地斷然自縊
喪其生

月孛臨喜怒宮

喜宮名為天極天曲天疊星若身命逢之為性凶險
作事猛烈只宜同五星在命并八煞官祿主有清貴
之職若庶人多災厄損妻子隨宮分斷之在身宮主
枷鎖之厄危險之災水火之厄被人誣賴母必有廢
疾若為僧道則有權亦主住持怒宮名為喪車鬼災
天彗星若身命遇之多是非貪酒色更犯煞星主徒
配遠方若官祿宮遇之皆主不測災及為貪婪至賤
之輩兼主惡死有救星則平僧道可免

月字躔宿俱出玉關經玉關歌

詩斷字躔角宿號天疊 情性聰明丰貌美

貪淫好酒心不賢 煞害傷妻須尅子

角木蛟辰龍 見字必爭雄

更逢陽刃位 劫寇法場中

角度相逢怕太乙 定遭犯歲多沉沒

金木吉曜與同行 老歲方能保替笏

字躔亢宿號天微 心毒如蛇事事危

易喜易嗔人不定 此生定是損妻兒

亢宿屬金龍 得孛反生凶

孛在龍前為武驪 藩垣坐鎮立邊功

太乙亢度最清奇 九度之中正所宜

金德同之真為美 財名橫發少年時

孛躔氏宿號天僉 凡事施為却得安

更得官星來救助 朱衣紫綬聳朝班

氏惡孛星同 裸體分外凶

誰知氏土貉

見孛反孤窮

太乙九月過一宮

九年一次到氏宮

官祿獨行陰夜喜

發災還與惡星同

孛躔房宿號天瞻

若臨身命為大權

文韜武畧居官顯

更立功名主重權

房免日方隆

東去孛共蹤

卯宮為刑曜

陰宿犯陽宮

太乙來房性妖孽

或女或男皆作劣

一生孤苦尅雙親 作事無謀心不決

孛躔心宿號天祗 官職榮華祿位宜

百里郎官名位著 叅謀半刺着緋衣

心宿孛難容 陽位孛孤窮

土星無夜忌 凶忌兩重凶

乙星為性多猛烈 心上相逢亦作孽

不宜水宿同度中 六親骨肉情皆別

孛躔尾宿號天該 家道興隆慶大來

身命逢之官祿至 將軍公輔蘊三才

尾宿屬春寅 孛到必消沉

兩宮寅卯位 到此惡難成

太乙尾宿不完全 危險如何保壽年

十箇八九多禍天 千思萬計實難言

孛躔箕宿號天華 位逢燕國定豪奢

官班自有超榮貴 財物金珠富一家

孛宿怕躔箕 箕風動刑妻

字到孤刑曜

妻位不相宜

乙逢燕分著緋衣

正喜遊宮定到箕

古法盛稱寅地旺

此人必貴定無疑

貴格云彗星寅位必躔箕

節鉞封侯被織衣

字躔斗宿號天囂

面生波浪口無聲

不是過房須有尅

貪花愛酒賭錢人

斗前難裸體

瞻斗有尊權

到此不嚴肅

朝斗與朝天

斗廿四度值乙星 多憂多樂亦傷刑

刑後忽然身富貴 為主圖夜月光明

孛躔牛宿號天芳 孤寡徒刑性更凶

若教疾病躔身上 免得生離不善終

牛宿號刑星 夜生更怕刑

孛水土牛忌 休問利和名

太乙忽然下牛來 入在高宮獨不災

此曜所為心性別 吉曜同之任意裁

孛躔女宿名暗金 毒害顛狂曜六親

花街柳陌貪遊冶 莫教老後更伶仃

女好孛星來 北闕孛須諧

餘宮皆裸體 到此不為災

乙星惡曜女家存 此命之人定有迤

所謀不定心疑慮 恩背情疎妻必分

孛躔虛宿名天智 萬事施為皆遂意

官班富貴旺門庭 只恐兒孫無一二

虛宿北辰宮

孛星作福從

北闕衆星拱

緋衣拜高穹

乙臨虛地將何決

萬事過人真殊絕

只宜夜旺此宮生

財似泉流官不竭

孛躔危宿名天姪

命若逢之旺一家

不是官崇須富盛

妻宮子位必吁嗟

危孛逢天京

室亥在前程

孛到為吉曜

少尅老方榮

乙曜臨人智術微 旺宮度分守於危

此身若不為臺諫 亦主當權宰相機

孛躔室宿名天仗 星到雙魚為正旺

逢之富貴必超榮 定作朝廷公與相

室孛好朝天 到此自虔懃

內室孛尊重 祿主少微垣

月孛室宿未為奇 眷屬孤傷靡不為

多招閒慮心頭事 老則防妻又損兒

字躔壁宿號天巴 旺地須逢到一家

身命逢之徒說好 到頭不免事如麻

玉關壁屬乾 字惟好此躔

天嚴非字立 朝天要夜蟾

太乙壁宮好殺害 為人不就事難任

百端心計多謀畫 盜賊奸雄忌火金

字躔奎宿號天便 賣盡田園賭盡錢

不是酒時須博奕 貪花浮浪見憂煎

奎宿戌宮排

溫柔怕字來

裸形奎暗曜

難堪字到猜

奎中遇字心難靜

身消瘦長貌充秀

寬心緊性好精神

聲名纔有終無壽

字躔婁宿號天邪

少年浮浪悅紛華

小急大寬心不定

平生終不受迤災

婁名天狗宮

字怕此曜逢

字來為陷害

凶曜必生凶

婁星最喜吉曜來 若逢太乙轉為災

若不刑傷并自縊 六親睽別不和諧

孛躔胃宿號天翰 性急情寬事少閑

只恐為官年不永 若居貧困壽如山

胃居戌位間 到此必安閑

至酉名吉曜 為福必闌珊

太乙臨人多災數 火喜曜來胃九度

夜生值此主歡娛 握掌兵機主宰輔

字躔昴宿名天喜 命若逢之姿貌美

妻宮損尅兩三重 祿位須逢升玉陛

昴屬酉日難 月門字相宜

諸宮皆裸體 惟酉着緋衣

常言字星偏喜酉 最利金牛宮昴宿

金能助用此中來 合主科名兼福壽

字躔畢宿號天詵 生須富貴顯家聲

仕途超越登科早 朱衣紫綬立朝廷

畢星是月門

字到朝至尊

畢星惟好雨

淫慾有名存

畢宿如逢太乙侵

不宜逢水與逢金

偏惹是非迷酒色

風癆痔漏暗傷身

字躔觜宿號天墜

門戶光輝是此人

年少登科官進速

性情容易便生嗔

觜好字用水

觜字喜命宮

字到為廟樂

七度莫言凶

宿觜若見孛來過 疾厄宮逢阻難多

五位臨之難得子 命宮身位祿消磨

孛躔參宿號天詮 官祿須逢抵不難

妻子宮中須有尅 更兼天壽在蒼顏

申位有參星 孛臨視不真

迺遷并度近 孛處兩相嗔

參水猿中見月孛 進退所謀皆恍惚

羅喉計都火來侵 不至中年便亡沒

貴格云水字到參非失位 貴持節鉞更無疑

字躔井宿名天誑 衣祿生來須大旺

資財恐是別人收 有子終須還破蕩

井來字昏濛 十七度無光

月宮字朝母 初度反作凶

太乙躔井未為強 神氣踈慵貌亦長

性裏欺良懷惡妬 若無星救恐刑傷

貴格云攙搶東井福偏饒 榆塞藩垣任可倚

字躔鬼宿名天詫 巨富官榮兩無價

為人毒害更英雄 先有聲名大權霸

鬼見正月明 字逢拜蟾京

朝瞻居母位 敬謹不生嗔

太乙之星守鬼門 語言稠重出人倫

身材魁偉多溫厚 遇夜生人少見述

字躔柳宿號天衝 將相功勲祿萬鍾

威望從來臺憲任 蜚聲騰實顯英雄

柳亭自優游

柳稍位近周

十四非為福

十三度公侯

乙星掛在柳稍頭

定知此命主公侯

更有木同秦地分

少年朱紫不勞求

亭躔星宿號天戎

定殺妻兒在少蒙

為人執拗心多強

衣食生來太不中

星午正陽明

大忌亭來侵

亭入終須晦

太陽亭難禁

乙星若在星邊過 又與羅睺同度坐

崢嶸負氣武兵人 志壯心高膽又大

李躔張宿號天權 妻子宮中未保全

衣食生來自豐足 性情高尚樂忠賢

張宿月鹿明 李臨號元真

須是旁奎宿 張曜李華明

太乙權威勢如虎 不宜張宿居於午

偏生庶出二重親 卓立生涯難守祖

孛躔翼宿號天譁

此是星辰到本家

喜怒不常多色慾

心如狼虎毒如蛇

翼好孛同行

孛躔翼宿亨

孛水宜同立

聲應位持衡

太乙本是惡強星

翼宿躔之疾壓身

女主產亡男癰疾

限行至此不光明

孛躔軫宿號天忒

戀酒迷花好遊奕

家財盡破好行偷

若不投軍須有尅

軫星屬巳宮

巳水字爭雄

陽極陰相續

相續自無凶

太乙獨行來到軫

為人性急多明敏

若逢土木再同居

破散資財離鄉井

月字入宮

太乙月字在虛危柳為樂井畢為廟翼為旺居此生
人主居官有威望人多畏服主有節察之位刑殺之
權在身命八煞宮見火為盜賊見金為不軌之事妻

亦不良在財帛則多耗散為脫賺但在身命官祿則吉在諸位則凶此曜為災福力大於諸星若見木即為臺憲之任見火為亂世英雄見水為盜

日木宮主為人重厚心直三方盡在強宮主少年榮達非在強宮主少年雖得貴人見知諸事不成立

火宮主為人性快出言不審是非一生宜防婦人損陷及小人暗窺主星在最高之地立在微職合少年立身

土金水月宮主為人性剛作事忠直有謀計好殺害
守虛危井柳鬼翼宿者主節察位

月孛同宮

孛金同宮為行不良妻亦然男為巫女為覲

詩斷金星與孛若縱橫 百六逢之大吉亨

人產遇時須抱福 家居金玉保康寧

孛水同宮主因文學有災多虛詐見四刑星主膿血
之災在三九宮主落水死不見屍

詩斷辰星不欲相交彗 男可為奴女可婢

邪淫奸濫主貧寒 畢世千謀無一遂

字火同宮心好善而實不能行亦多癰疽膿血

詩斷焚惑最能誅字彗 掃除撓搶為慶瑞

官榮上爵秉威權 百六逢之為禍害

字木同宮宜官不宜才藝夭壽為悖逆之徒

詩斷木字原來主壽齡 今日無分重與輕

人生八十高年客 皆由四正有強星

孛土同宮夜照損壽傷財刑害瘡痍之疾

詩斷其如土孛坐天心 雖要分明見太陰

不顧順留并伏逆 布衣從此振儒衿

孛羅同宮各居廟旺主有威權

詩斷彗星若與羅喉會 勒石紀功揚塞外

常人遇此至千殃 百六遇時愈殃害

孛計同宮為姦淫不廉不潔多損多破

詩斷彗星計都不可逢 人生薄賤主貧窮

須招風疾并癆厄 百六當之不善終
陰人計孛若人命 定是淫邪色慾娘
若得善星來同照 遇雲歌舞近侯王
孛炁同宮主性巧聰明多技藝足文詞衣祿有權治
之人

詩斷蹇薄皆由孛紫逢 離鄉背井道途中
多情色慾仍為盜 千方百計也還窮
孛日月同宮主防父母居官有生殺之權日好訟夜

好酒賭博

詩斷日李相交名字損
反使吉人心惻隱

姦臣叛世不生茲
百六會時保安穩

日同彗李大為凶
百六當之禍患重

犯法蛇傷并虎咬
倥侗畢世一顛蒙

琅玕經節要

李為陰曜最宜夜照廟旺身高機權兵要晝李日同
財名有望夜李月同財祿榮旺主背多貧運為阻障

羅喉同位喜旺雄貴逢忌宮惡多迷多否

二星各居廟旺或在高強主雄貴重權之位更若同忌星在陷弱宮即多刑尅

天乙同宮奇能巧技衣祿豐厚不無掌治土與字同夜招刑尅畫人若逢廣招財利

字同計火畫逢主禍短壽多刑災厄破敗夜生貴旺衣祿常殊臨順廟權掌兵符

字計日逢主夭壽不夭折則風癩顛狂凶死夜照主

衣祿興崇好華飾若在廟旺有武祿重權貴氣金水
夜同職位顯榮畫人主順財祿豐隆身主同惡妖濫
困窮忽然無救亦不善終木星照順福慶亨通縱然
惡厄亦不致凶

月孛照臨十二宮

命宮

守照命宮眉目疎秀體貌堂堂器量宏偉瞻視自尊
大寬小急為人性重易好易惡好殺毒害奸雄氣烈

入廟反為權柄善星相扶少年及第無吉星輔助必
為災咎為人不足多病不快活假饒富貴亦主弄波
食祿之人無由安閒貪酒好色夜照獨宮身名亨達
如是畫生破失根涯在妻宮則妻損早在官祿則居
官有威望人多畏服有生殺之權與首尾同宮尅害
妻子與天乙對望處世多逆其星名天吏星主祿雄
豪又名催官煞諸星皆吉而孛方入乃為催官若孛
臨要出宮者不係旺在秋冬為災為福力大於諸星

在身命則吉在諸位則凶

詩斷孛命宮人

初年災破頻

機術心自有

權謀亦及人

早歲防傾覆

中年立有成

夜生陰位照

財祿有聲名

老陰月孛最凶神

豈有臨人照命身

若在強宮為祿主

總領邦國作權臣

孛星守照在巨蟹

若在高強亦得解

更遭羅計與土星 只主有錢能放債

月字昏沉性不常 讀書多懶好遊行

不如別作榮身計 莫被儒冠誤一身

月字須知是惡星 逢之禍患卒難行

若要入廟宮中者 必定前程有大成

財帛宮

生來少積夜食平常假饒初年承祖之付託財帛興
旺如三春開花正發時狂風猛雨折拔其根枝若土

星照視則產業生旺頻加無破敗也○孛照財上暗
昧無主執財物耗散

詩斷孛照財宮真可畏
須防人賴暗為災

限逢惡曜君須忌
吉宿同臨主橫財

凶神月孛臨財時
破蕩傷殘豈所宜

假使堆金如山海
會合消鑠似塵微

兄弟宮

皆不得力縱有昆季他東我西彼死我活相見之時

如水投火却見他人反成親戚所謂親踈義重不親
却親宜自卓立○字照主尅兄弟惡橫

詩斷字星無禮最乖張 那更凶殘在陷方

不見弟兄同燕鴈 只聞手足似豺狼

字星對照兄弟宮 各自榮家各自豐

縱使牛田衣食足 兄若西時弟亦東

手足為親難得力 只為其宮逢月字

爭取家資不孝人 兄弟心強相妬嫉

田宅宮

尅傷父母縱有祖業終須破散若居次旺則不以傷
尅論更加土字同行多主偏房庶出○字照一生破
散住宅不定有成有敗祖業破盡宜與異性同活

詩斷田宅宮中土字防三方閑極可悲傷

此身若不為僧道必喚他人作父娘

莫愁月字是凶時有人因此田園旺

只緣廟坐午申間午後申前及未上

孛星加臨在田宅 初年資財真不竭

陰人最不喜其星 嫁出夫家無寸鐵

男女宮

主男少女多又宜心性相壓及遲見方好○經云男
女宮中怕遇孛無男只是女生多若得吉星同照視
晚招一對不堅牢如六丁生人化囚見之在此宮者
全無子息假饒有三男二女如冤家骨肉一箇拘束
一箇拘西如有吉星合照則猶較可與太陰對視則

男主有貴女主封號長則性慵昏蔽少則伶俐惺惺
別星則減力矣○孛照合難得子息多患瘡癰之疾

詩斷子孫宮裏孛星攻 狀類根甘蒂苦同

假使門庭當旺盛 也生不肖辱先宗

月孛來遊至第五 男女雖多多枉死

直饒庶子與過房 於法推之多絕嗣

奴僕宮

多不得力亦有走失○孛照不可托小人作事有暗

昧刑尅之厄

詩斷奴僕惟推最弱宮
字星臨照愈為凶

當生祿主或全陷
衣食犇波守困窮

月孛為星不可言
當生逢着病相纏

若交奴僕同宮分
反主妻奴白日眠

妻妾宮

須兩三妻妻命有此星相抵
反有偕老之期賦云妻
無子息都緣字在高強
○經云月字守妻宮奴婢結

為宗無曜居六五為人主脫空○註云妻性惡則免
李照合得尊貴慈善之妻反招偏房之妾方應
詩斷李星若在照妻位 不是傷夫妻亦防

多幸隨人為側室 不然卑賤得從良

婦人月李入夫宮 反主夫家財帛豐

更在未方為主將 母死父亡財帛隆

望門尅婦婦家貧 只因月李到孤神

戊亥丑申三四位 夫妻和順定無因

疾厄宮

自小多害病主瘡疥小歲難養○孝照有大馬所傷
之厄膿血之災不可針灸因此抱疾

詩斷孝居第八照身宮 三合無星不可逢
死在路頭無板載 更防官死獄囚中

月孝伏劍疾宮來 年少沉疴染重災
歲久不聞歡喜事 年來常聽哭哀哀

遷移宮

不得遠出主有險阻之難○經云第九宮中值孛星
終身流蕩百無成○孛照主外鄉陰害小人刑官之
事

詩斷孛宮第九死他鄉 路上橫屍不可當

羅計更臨獅子位 法場之地見身亡

孛計遷移又併羅 偏於土木損財多

雖然已有堪居地 毀拆移居不奈何

官祿宮

有大人君子之權更居樂廟之宮則官職清高小人帶之則血光刑責○孛照多因暗昧之事起災必有重官厄凡遇陰人不可交結

詩斷月孛午地是陰宮 食祿雖遲也不空

或若火星逢祿主 多因官職至三公

月孛光芒號彗星 衆星一見歛威明

廟方若作天元主 貴擁貔貅百萬兵

入廟星辰最難得 若臨官祿尤為吉

鸞臺鳳閣更光華 只忌陰陽同月孛

孛星主祿大雄豪 只要相參土火高

斗角柳中為受用 文經武緯列勲曹

福德宮

多主反覆纔有好事反成凶兆○孛照須有不明
人陰謀相損

詩斷福德宮中要好星 如何孛照有昌榮

心頭搔擾勞魂夢 日日思量欲改更

福德宮中怕孛星 忽然火曜兩相刑

終身只可三旬壽 縱得長生也受迤

相貌宮

一生為災經云惟有太乙月孛星生時不欲臨此地

○孛照為人膽大不信陰陽作事不祥

詩斷十二宮中有孛星 形貌龐醜懼知聞

性情不定如狂妄 舉止無憑似少神

十相不完身踣躄 六根虧損善艱辛

縱然身在公侯位 斷作狂愚廢棄人

月孛變段星

寶瓶宮天權星○又名天烈星主武勇心機悍烈也

詩斷月孛臨人狀似虎 子上天權巧心路

若是獨行無別星 掌握權衡至台輔

磨蝎宮伏屍星○又名流血星主流血惡死

詩斷丑宮月孛見伏屍 身宮官祿最凶危

更有吉星相扶助 福德宮逢短命兒

人馬宮天虎星○又名天獄星多招牢獄罪責

詩斷天虎字星寅地旺 喜臨箕尾福非常

吉凶二曜不相犯 四正宮逢福祿昌

天蝎宮五鬼星○又名天文星主狡猾陰謀讒佞夭
壽

詩斷天衡五鬼為妖孽 女落風塵男下劣

妻家喪盡定無人 孤獨一身無處立

天秤宮天妖星○又名破軍星主威猛色慾

詩斷天妖辰上為凶恠 八煞遷移為六害

若非寄食別人家 庶出倚親多此輩

雙女宮雙鸞星○又名慧孛星主死兵刃毒藥

詩斷孛臨天乙號雙鸞 男女逢之是寡鰥

更值惡星須惡死 吉星相救可安全

獅子宮天鬼星○又名流尸星主刀鎗弓矢之難

詩斷天冠加臨獅子宮 星張二宿最為凶

如躔柳宿番成吉 富貴功名百事通

巨蟹宮垣廟星○又名威猛星主威猛尊嚴

詩斷孛星最喜到秦州 文作清華武列侯

不怕惡星侵此位 平生富貴自優游

陰陽宮天吉星○又名敗殘星主敗殘亂家道也

詩斷申宮天吉少人知 四正宮逢得者稀

戊乙庚人為上吉 名標四海福相隨

金牛宮金堂星○又名文際星主文章際會也

詩斷金堂酉地喜相侵 不習詩書亦有名

自是蔭封多福祿
錦衣閭里有家聲

白羊宮天囚星○又名天邪星主凶猛中失職祿


詩斷成中月孛號天囚
白髮孤寡亦未休

此曜乚強如在上
官災橫禍作冤讎

雙魚宮遊魂星○又名威職星主陰人多妖

詩斷孛星須是要安和
亥上遊魂福最多

祿上資財當巨富
終身落薄更消磨



星學大成卷二十